

Surat khabar: Utusan Borneo (Horizon)

Hari/Tarikh: 15/8/2016

Muka surat: A1

Tajuk : Pelajar IPTA digalak sertai PALAPES

Pelajar IPTA digalak sertai PALAPES

Oleh Agnes Tugong

PELAJAR institut pengajian tinggi awam (IPTA) di negeri ini digalakkan untuk menyertai unit beruniform seperti Pasukan Latihan Pegawai Simpanan (PALAPES) Udara dan PALAPES Darat.

PALAPES ditubuhkan di institut pengajian tinggi seperti Universiti Malaysia Sarawak (UNIMAS) untuk melatih pelajar dalam ilmu ketenteraan bagi membina insan yang berdisiplin dan bersemangat tinggi.

Menurut jurulatih PALAPES Udara Sarjan Themotty Jagak, kedua-dua pasukan yang ditubuhkan di UNIMAS ini ada menyediakan kemudahan dan keistimewaan kepada pesertanya.

Pelajar yang menyertai PALAPES akan mendapatkan penginapan tetap di kolej kediaman selama tiga tahun pengajian dan bilangan jam kredit (6) bagi tujuan pengijazahan.

Selain itu, makanan, pengangkutan, pakaian dan peralatan khas ketenteraan percuma semasa latihan turut disediakan selain elauan bagi latihan tempatan berterusan, kem tahunan, istiadat pertaulihan, pakaian seragam, senggaraan pakaian dan sagu hati tahunan.

"Pelajar yang sudah mendapat tempat di UNIMAS serta berminat menyertai PALAPES UNIMAS boleh mendaftar pada tarikh Minggu Aluan Pelajar pada 29 Ogos hingga 2 September akan datang ini," katanya.

Pada 31 Ogos pula akan diadakan ceramah bagi badan unit beruniform UNIMAS serta pendaftaran kemasukan badan beruniform untuk pelajar UNIMAS.

Dalam perkembangan berkaitan, PALAPES Udara dan Darat UNIMAS telah menyertai kawad penyatuan bagi Pertaulihan Diraja Ke-35 di Universiti Malaya (UM) sebagai tuan rumah tahun 2016 ini.

Kawad penyatuan ini telah disertai oleh pegawai dan jurulatih PALAPES Udara dan Darat UNIMAS antaranya, Ketua Jurulatih Mejar Razali Manan, Pegawai Latih Darat Kapten Mohd Faiez Abdul Rahim dan Pegawai Latih Udara Kapten Andy Indera Norakman Kamaruzaman.



KENANGAN: Themotty merakam kenangan bersama pegawai, jurulatih dan anggota PALAPES Udara dan Darat UNIMAS pada latihan kawad penyatuan di padang UNIMAS.